

# FORUM ONG TIMOR LESTE THE TIMOR LESTE NGO FORUM



Rua do Mercado Municipal, Dili Timor-Leste / Mobile +670 7723 5698 / [forumong.tl@gmail.com](mailto:forumong.tl@gmail.com) / <https://fongtil.org.tl/>

## PARESER HUSI FONGTIL BA PARLAMENTU NASIONAL

### KONA-BA

#### PROPOSTA ORSAMENTU RETIFIKATIVU 2023

##### **Introdusaun**

Durante periode fulan hira nia laran, Governu esforsu makas hodi elabora orsamentu ratifikativu 2023 atu ezekuta iha fulan hirak tuir mai iha tinan ida ne'e. Orsamentu retifikativu ida ne'e elabora atu Ajusta no aliña ho mudansa sira ne'ebé Governu halo tuir orgániku Governu nian ne'ebé hetan tiha ona publikasaun iha Jornal da Republika.

Ami mós apresia katak Governu prezenta tiha ona ninian programa ba tinan lima, ne'ebé hatudu vontade forte atu lori Timor-Leste sai husi difikuldade naruk ne'ebé seidak iha alterasaun. Ami enkoraja atu avansa sira kontinua konta ho kontribuisaun sosiedade sivíl no entidade nao Governamental sira atu hetan perspectiva diferente no iha liu tan opsaun barak no minimiza risku ba fallansu sira.

Ami mós apresia ba vontade Governu nian atu kontinua promove transparénsia no partisipasaun Sosiedade sivíl nian ne'ebé inklui tiha ona iha programa tinan lima durante mandatu IX Governu ida ne'e nian. Ami kontinua disponivel atu iha servisu kolaborativu ne'ebé ativu husi perspectiva diferente ho atuaun krítiku.

##### **Transparénsia no Partisipasaun**

Maski prosesu elaborasaun ida ne'e Governu la halo konsultasaun públiku ida no la envolve Sociedade Sivil maibé ami kontinua prontu atu ajuda Parlamentu Nasional hodi oferese pontu de vista sosiedade sivíl nian ba ajuda mellora diskusaun iha PN durante debate ba Proposta OGE retifikativu.

Ami hetan proposta orsamentu retifikativu ne'e husi Komisaun C Parlamentu antes loron ida husu ami atu submete ami nian pareser ba Komisaun ida ne'e ho hakerek atu kontribui faktu no analiza ruma prosesu elabora relatóriu no Paraser Komisaun nian.

Ami apresia katak Governu publika duni Proposta Orsamentu Retifikativu iha website Ministeriu finansas nian maibé la públiku iha tempu suficiente atu iha tempu apropriadu ba públiku no ami sosiedade sivíl atu hetan informasaun no elabora ami nian submisaun ho di'ak.

Maski ami hato'o tiha ona kontribuisaun ba Komisaun C maibé ami la hetan oportunidade atu iha audiénsia ho Komisaun C atu halo diskusaun iha meza ida hodi hato'o ami nian analiza no perspectiva. Ami enkoraja atu envolve Sociedade sivíl ho prosesu tomak no apropriadu atu mantein komitmentu ba parseria entre Sociedade sivíl no Parlamentu Nasional.

## **Pontu de Vista ba Konteúdu Orsamentu Retifikativu**

Maski ami apresia katak Proposta Orsamentu Retifikativu iha redusaun maibé ami sujere atu Parlamentu Nasional bele uza nia kompeténsia hodi halo ezersísiu fundamentál liu hosi redús tan montante Orsamentu Retifikativu ne'ebé Governu propoin.

Ami sujere atu la kontinua ho projetu sira ne'ebé maski importante maibé la urjente. No Aumenta alokasaun ba setór esensiál sira ne'ebé liga direktamente ho Povu nian moris no harii sistema ekonómiku ida ne'ebé produtivu no sustentavel. Ami sujere aumenta osan sosa ai-moruk hodi aseguara dispoñibilidade ai-moruk iha SAMES no Ospitaisno sentru Saude sira hodi hatán nesesidade populasaun nian.

Ami sujere atu Opta planu sira husi Lei Grande Opsaun Planu (GOP) hodi reflète iha planu Orsamentu Retifikativu ba dezvoltimentu setór edukasaun tanba konsidera fornese oportunidade barak ona ba investimentu iha infraestrutura edukativu ne'ebé abandona tinan barak. Situasaun sira kona ba infraestrutura la adekua, facilidade sira no materiál aprendizajen inklui formasaun ba profesór hetan liu kbiit atu halo mudansa hodi responde dezafiu edukasaun atuál bainhira hetan alokasaun orsamentu natoon husi OJE kada tinan.

Presiza iha investimentu ne'ebé sériu no natoon iha alokasaun OGE kada tinan ba setór Bee moos, liuliu iha orsamentu kada Munisipiu aloka mós ba operasaun no manutensaun atu bele garante funsionamentu sustentabilidade sistema bee moos iha área rurais. Iha alokasaun atu foka mós ba qualidade bee ne'ebé fornese ba comunidade sira (polítika Konservasaun Bee no Rai).

Husu ba Governu Presiza aplika Lei Ordenamentu Territorial, Polítika Desentralizasaun no Podér Lokál.

Governu presiza investe iha setór produtivu sira inklui infraestrutura hanesan estrada no ponte, parte ida atu reforsa ekonomia família (rendimentu família) iha área rurais

Hodi aselera dezvoltimentu ekonomia persija tebes governu nia atensaun ba setór infraestrutura bázika sira hanesan; Rehabilitasaun no manutensaun Estrada Munisipál ba Postu Administrativa, Suku no Aldeia, presiza tebes fó atensaun másimu, no suspende ba kompanha sira nebe lahatudu prestasaun servisu diak (Purexemplu : projetu Estrada liga husi Larigutu-Ossu Villa). Haforsa sistema qualidade kontrolu ba facilidade publiku sira atu labele dependensia ba kompanha implementador sira. Halo Rehabilitasaun no manutensaun ba irrigasaun sira, Konstrui sistema irigasaun foun ba comunidade agrikultór ne'ebé iha Natar (Purexemplu Natar **Irabere-Iliomar**) atu bele esforsu aumenta sira nia produsaun haree iha futuru.

Parte edukasaun nian presiza harii Edifiu administrativa profesór no mos konstrusaun biblioteka iha kada eskola filial no mós báziku sira.

Iha prosesu ba elaborasaun Orsamentu Retifikativu iha nebe sosiedade Sivil kontinua hato'ó Preokupasaun sira hanesan tuir mai;

1. Governu halo ona revizaun ba Lei Tributaria no redús ona taxa seletivu husi 5,2% ba iha 2,5% husi redusaun taxa refere tuir sosiedade sivil nia hare katak, iha poténsia ema sira ne'ebé iha kapitál sei la selu taxa.

2. Tuir mai nia perspetiva hare husi implementasaun empreza publika sira tenke halo esforsu hodi halao knar ho diak e laos foku ba hodi hetan reseitas maibe asegura povu hotu bele asesu ba nesesidade baziku (Bee no Ahi) nudar direitu baziku.
3. Alokasaun orsamentu realistiku ba investimentu iha setór agrikultura hodi responde ba dezafiu sira no dezenvolve potencialidade ne'ebé iha liu – liu liga ho konservasaun rai,be, fini (estabelese banku fini) no matenek lokál. reforsa partisipasaun foin sa'e iha prosesu dezenvolvimentu setór agrikultura, promove modelu agrikultura familiár no agroekonomia
4. Haforsa hikas funsionamentu KONSSANTIL ba reforsa koordenasau no kooperasaun entidades relevantes sira
5. Preve rekursu ba hahú estabelese instituisaun ne'ebé tau matan ba qualidade produktu rai laran partikularmente instituisaun ne'ebé fornese sertifikasaun ba produktu orgániku rai laran

### **Ami nian sujestaun kona-ba proposta alterasaun ba lei tributaria;**

Ami sujere atu Parlamentu Nasional simu proposta alterasaun ida ne'e nudar oportunidade Politika hodi define politika taxa ne'ebe apropriadu liu hodi regula importador sira kontribui ba reseita estadu hodi gradualmente nudar fonte ida hodi ajuda lori balansu entre reseita no despeza estadu nian. Ami mos sujere atu Parlamentu Nasional diskute klean ho Governu hodi hasoru previzaun legal iha lei sira relevante hodi oferese oportunidade orsamental ba iniciativa lokal hodi produs no asegura disponibilidade aihan no nesesidade sira Nasaun nian.

Ami nian preokupasaun kona-ba proposta alterasaun ba Lei ekuadramentu Orsamental, iha proposta ida ne'e Governu husu atu hasai oportunidade partisitivu hanesan Jornada planeamentu no Lei grande opsaun Planu, ami hanoin katak proposta ida ne'e, se la alina ho prioridade Governu nian ne'ebe atu enkoraja partisipasaun publiku no sosiedade sivil nian. Ami sujere atu PN halo exersisiu fundamental ida hodi prevene no hrafraku liu tan transparansia no partisipasaun ne'ebe ita hotu hakarak ba ita nian rain doben.

### **Rekomendasaun**

1. Husu Governu atu Kontinua mantein taxa seletivu no la presiza halo revizaun ba Lei Tributaria no redús impustu.
2. Governu presiza promove kontribuisaun husi ema ne'ebé iha Kapital investimentu ekonomia.
3. Governu presiza promove partisipasaun husi entidade hotu iha prosesu elaborasaun ba planu no orsamentu liga ho destinu estadu
4. Presiza kria subsidiu no insentiva ba agrikultór sira atu hakbiit no dezenvolve setór produtivu sira iha Timor- Leste hodi garantia investimentu ne'ebé Sustentabilidade Estadu